

07/08/1998

PM hargai sokongan parti lawan

Mahfar Ali, Dzulkfley Zanudin; Azmi Md Deros
IPOH, Khamis - Datuk Seri Dr Mahathir Mohamad menghargai sokongan penuh parti pembangkang terhadap pendirian kerajaan dalam menanangi isu pemindahan Pusat Pemeriksaan Kastam, Imigresen dan Kuarantin (KIK) dari Tanjong Pagar ke Woodlands, Singapura.

"Sokongan ini menguatkan lagi negara kita dalam menghadapi masalah ini," kata Perdana Menteri ketika mengulas kesepakatan penyokong kerajaan dan pembangkang mengenai usul berkaitan isu itu di Dewan Rakyat, Selasa lalu.

Dalam usul yang dikemukakan Ketua Pembangkang, Lim Kit Siang (DAP-Tanjong), parti pembangkang menyuarakan sokongan penuh terhadap kerajaan dalam menangani isu itu.

Dalam sidang akhbar selepas majlis Perhimpunan Bersama Rakyat hari ini, Dr Mahathir berkata, sehingga kini Malaysia masih menunggu reaksi Singapura berhubung pendirian kerajaan.

"Bagi kita, sekiranya tidak ada pilihan, kita akan terus kekal di Tanjong Pagar," katanya.

Perdana Menteri berkata, Malaysia sedia berpindah ke Woodlands, tetapi pihak Singapura mestilah memberi tempat yang selesa untuk pegawai dari negara ini bertugas di pusat pemeriksaan baru itu.

"Masalahnya dia kata sudah habis masanya untuk kita bersetuju duduk di Woodlands. Dengan itu dia tidak dapat bagi tempat kepada kita dan hanya sanggup beri dua meja di tepi platform ... nampak tak eloklah.

"Tiba-tiba pula dia kata tak ada tempat dan kita lewat ... kena keluar dari Singapura dan balik ke Johor Bahru. Jadi macam halau kita keluar," katanya sambil menegaskan belum masanya bagi beliau menemui Perdana Menteri Singapura, Goh Chok Tong, bagi menyelesaikan isu itu.

Setakat ini, kata Dr Mahathir, beliau juga belum dihubungi dan perbincangan mengenai perkara itu hanya membabitkan peringkat pegawai kedua-dua negara.

Mengenai tindakan Singapura menghadkan tempoh bagi rakyat Malaysia memasuki republik itu kononnya untuk mengelak kemasukan pekerja haram, Dr Mahathir berkata:

"Itu hak dia. Kalau tidak boleh masuk tak apa kita boleh kerja dalam negeri."

Dalam sidang akhbar itu, Dr Mahathir juga ditanya mengenai kenyataan Presiden Indonesia, B J Habibie, yang secara terus terang menganggap Singapura sebagai bukan 'kawan semasa susah'.

Perdana Menteri enggan mengulas panjang, sebaliknya cuma berkata: "Itu pendapat Habibie mengikut pengalamannya."

(END)